



الحمد لله وأشهد أن لا إله إلا الله وحده لا شريك له وأشهد أن محمدًا عبده ورسوله - صلى الله عليه وسلم- أما بعد،،

المرة الماضية في اللايف الماضي بدأنا كلام عن موضوع خطير هو موضوع الرضا عن الله -سبحانه وتعالى- والحقيقة بحسب إن أنا بتكلم في الموضوع دوت إن أنا عايشين في عالم آخر، من الآن **يتكلم عن الرضا عن الله؟** من الآن يعني يظهر ويتمسك بهذه العبادة

العظيمة، **الرضا عن الله؟** في عالم مليء بالشكوى مليء بالآلام وليس الشأن في الآلام، وإنما الشأن في كثرة الشكوى، الناس تشتكي كل صغيرة وكبيرة، الناس الآن يعني صارت بتغني بتغني يعني تظهر ألمها في ذم الدنيا وذم الليل، تبدأ أغاني الناس يقعد بقى يقولك الدنيا عملت فيا والدنيا سوت فيا ويغنوا الليل عمل فيا والنهار عمل فيا والزمن عمل فيا، وكل ده علشان يبعد عن إن هو يبين عدم رضاه عن الله -سبحانه وتعالى-، فهذه الكلمات كلمات قبيحة التي يشتكي فيها الناس ربهم، ولو كان في صورة إن هما بيشتكوا الأيام ويشتكوا الزمان ويشتكوا الليل ويشتكوا النهار ويشتكوا الزمن، وحاجة يعني بقى دلوقتي العادي خلاص، يعني قل ما تجد أحد تبدو عليه

علامات الرضا وسمات الرضا، وقل -يعني-
الراضون عن الله -سبحانه وتعالى- الراضون
بقضاء الله -سبحانه وتعالى- الذين يعني تعرف
في وجوههم سيم الرضا وعلامات النعيم،
ودائمًا يا أحباب قاعدة مهمة عندما تجد باب
إلى الله -سبحانه وتعالى- قلّ من يدخل فيه
ويطرّقه فأعلم أن هذا الباب هو أفضل باب
تقف عليه في معاملتك مع الله -سبحانه
وتعالى- لأن دأيمًا القلة مميزة، فربنا قال
"وَقَلِيلٌ مِّنْ عِبَادِيَ الشَّكُورُ"، وقال ﴿وَإِنَّ كَثِيرًا
مِّنَ الْخُلَطَاءِ لَيَبْغِي بَعْضُهُمْ عَلَى بَعْضٍ إِلَّا
الَّذِينَ آمَنُوا وَعَمِلُوا الصَّالِحَاتِ وَقَلِيلٌ مَا هُمْ﴾
فدأيمًا القلة مميزة عند الله -سبحانه وتعالى-
فنحن في زمن في حاجات كده بدأت تروح فيه
خلاص، زي مسألة الرضا عن الله -سبحانه

وتعالى-، فمن وقف على باب الرضا عن الله -
سبحانه وتعالى- فقد وقف على باب عظيم
عظيم قلّ الواقفون عليه، قلّ الواقفون عليه فإذا
رأك الله تعالى واقفاً على أعتاب هذا الباب مع
قلة من يقف على هذا الباب، فإن هذا يعني
قرين الأجر الكبير والمعاملة المميزة من الله -
سبحانه وتعالى- لك، طيب احنا دورنا ايه؟
دورنا بسيط جداً إن احنا بدأنا المرة إلهي فانت
في الكلام، أو نقل كلام ابن القيم من كتاب
مدارج السالك من كتاب مدارج السالكين، ابن
القيم -رحمة الله عليه- عمل فصل كده في
كتاب مدارج السالكين اسمه فصل الأسباب
التي تعين على الرضا الأسباب التي تُعين
العبد على الرضا، يعني إزاي إنسان يحصل
له قدر من الله -سبحانه وتعالى- بغض النظر

هو القدر دوت طبعًا عادة بيكون القدر إلهي هو
مكروه للنفس، لأن طبعي الإنسان القدر
المحبوب ليه ما عندوش فيه مشكلة وإنما
مشكلته دائمًا في القدر المكروه ليه، فهو يقول
ازاي العبد يستقبل هذا القدر المكروه له؟
وينتقل من إن هو صابر عليه إلى إنه راضي
كمان يعني إيه الحاجات إلهي تساعد على
كده؟ المرة اللي فاتت اتكلمنا على عشر أسباب
يعني ابن القيم ذكر فاكرين احنا قلنا طب
سؤال فاكرين ابن القيم ذكر كم كم سبب؟ يعين
على الرضا في كتابه مدارج السالكين طبعًا
الكتاب مدارج السالكين كتاب كبير أنا دائمًا
بنصح بالتهذيب في كتاب اسمه تهذيب مدارج
السالكين هو مختصر يعني، بس فاكرين أنا
قلت لكم كم سبب يعني من القيم ذكر كم سبب

يُعين على الرضا المرة إلهي فاتت كان رقم
مفاجأة يعني بالنسبة لكم، احنا اتكلمنا ها مين
يفتكر؟ كم سبب ذكره ابن القيم؟ يُعين العبد
على الرضا ما ده بس ابن القيم أنتم عارفين إن
يوم ما بيستفتح كده بتلاقي الدنيا ايه؟ طاحت
يعني ما شاء الله فتح الله يعني له شرح الله
صدره وأجر الله قلمه بالكتابة، ابن القيم ذكر
فعلاً أكثر من ستين سبب، ستين سبب يُعين
العبد على الرضا احنا المرة إلهي فاتت قعدنا
طول الوقت قولنا عشرة بالعافية، فيعني لو
النهارة قلنا كمان عشرين حلو أوي كده
والتانيين كملوا أنتم بقى الفصل ده مع نفسيكم
بقى، طيب خلينا نبداً هو الدرس ده كأنه درس
كأنه درس مستقل على فكرة، لأن ابن القيم
بيقول أسباب يعني يعني بغض النظر بقى في

عشرة فاتوا أو عشرة جاين، هو كل سبب
مستقل بذاته فخلينا نقول نبداً بكلام ابن القيم
سبب الحادي عشر، أو خلينا الحادي عشر
إزاي العبد يرضى عن قدر الله لو كان حتى
مما يكرهه أو مما يؤلمه، بيقول بقى ابن القيم
كلام خلينا كده إيه؟ نستمتع بكلام ابن القيم،
بيقول: **"أن يعلم العبد أن تمام"** أنا عبد
دلوقتي بيقول: **"تمام العبودية في جريان ما**
يكرهه من الأحكام عليه ولو لم يجري عليه
منها، إلا ما يُحب لكان أبعد شئ عن العبودية
فلا تتم له العبودية من الصبر والتوكل
والرضا والتضرع والإفتقار والذل والخضوع
وغيرها إلا بجريان القدر بما يكره"، يعني ما
هو طبيعي لو كل حاجة ربنا بيعملها فينا هي
الحاجة إلی احنا عايزينها وبنحبها وبنتمناها

ما كنتش دي عبودية لأن العبودية لا تظهر
عندما يأتيك من المعبود ما يعني نظرك
القاصر يكرهه ولا يألفه ولا يريد له ولكن
خلاص وقع عليك ولا مفر منه هنا يظهر بها
الإيه؟ تظهر العبودية تظهر العبودية ويظهر
بقى ما يحبه الله من أفعال لا يمكن أن تحصل
إلا أن يقع عليك ما تكره، زي إيه؟ زي الدعاء
زي الإفتقار زي التضرع زي الصبر زي
الرضا زي التوكل، هناك عبوديات لا تحصل
للعبد إلا لو حصل وقع عليه ما يكره ولو كان
دائمًا يقع على العبد ما يحب لما كانت هذه
عبودية، في الحقيقة إذا حصل للعبد دائمًا ما
يحب فهي في الحقيقة عبودية للهوى يعني هو
كده في الآخر اسمه بيعبد ربنا بس في الحقيقة
هو بيعبد هوى، هو مبسوط لأن هو ده موافق

لطبعه وموافق لهواه عشان كده ابن القيم
بيكمل يقول إيه؟ "وليس الشأن" "وليس
الشأن في الرضا بالقضاء الملائم للطبيعة،
وإنما الشأن في الرضا بالقضاء المؤلم
المنافر للطبع" المنافر للطبع فهمناها فهمنا
نمرة حذاشر دي جميل أوي، طيب بيقول رقم
إلي بعد كده، دي جامدة جدًا "أن يعلم أن
رضاه عن ربه في جميع الحالات يُثمر رضا
ربه عنه في جميع الحالات فإذا رضي عن الله
بالقليل من الرزق رضي ربه عنه بالقليل من
العمل وإذا رضي عنه في جميع الحالات وجده
أسرع شيء إلى رضاه إذا ترضاه وتملقه"
تاني، أن يعلم أن يعلم أن رضاه عن ربه في
جميع الحالات يثمر رضا ربه عنه، وجاء في
الحديث "فمن رضي فله الرضا" فمن رضي

فلله الرضا صح؟ بص ابن القيم بيقول إيه؟
بيضرب مثال يعني "فإذا رضي عنه بالقليل
من الرزق رضي ربه عنه بالقليل من العمل"
جامدة أوي دي يعني كنت كتبتها في بوست
قبل كده وناس ماكنوش مستوعبينها يعني إيه
الكلام ده وجاييه منين؟ والكلام ده، جاييه من
كلام ابن القيم وقيل أن الكلام ده بيُنسب للحسن
البصري، من رضي عن الله بالقليل من الرزق
رضي الله عنه ربه بالخير عمل أنت الآن ربنا
أعطاك رزق قليل رزق قليل فأنت رضييت
والجزاء من جنس العمل يعني شرح الجملة
دي إيه؟ الجزاء من جنس العمل أنا ربنا
أعطاني رزق قليل، وخذ بالك الرزق ده مش
لازم يكون فلوس لأ، ممكن يكون جمال
أعطاني جمال قليل، ممكن يكون أولاد لم

يُعطيني أولاد مطلقًا أو أعطاني ولد واحد و ثم
لم يأتني إلا هو، ممكن يعطيك من القوة فتكون
رزقك في القوة قليل، أو قليل من المال ويكون
رزقك في المال برضو قليل، طيب أنا لما ربنا
ابتلاني بهذه بالقلة في الرزق دوت سواء في
المال أو الأولاد أو الجمال أو القوة أنا رضيت
أنا إيه؟ أنا رضيت عن الله -سبحانه وتعالى-
الجزء من جنس العمل لو أنا بقى عملي قليل
عملي قليل ربنا يرضى عني بهذا العمل القليل

يعني عمل قليل يعني إيه؟

 يعني بتعمل واجبات وبتترك المحرمات
بس يعني في غير كده مقصر شوية مش
بتعمل مستحبات كتير.. في المكروهات
برضو مقصر رغم إنك أنت في الظاهر عمك
قليل أوي، لكن ربنا يدبك كتير أوي ليه؟

لأن أنت برضو أنا لما أعطيتك رزق قليل
رضيت عني فأنت إذا تعبدت له بعمل ولو
قليل أرضي به عنك.. أرضى به عنك.

عشان كده ده بيفسر لنا الراجل الفز ده 
إللي دخل على النبي عليه الصلاة والسلام في
ثلاث أيام ورا بعض بيقول يدخل عليكم رجل
من أهل الجنة فيدخل رجل عادي يعني كل
مرة يدخل نفس الرجل فمعروف القصة إن
عبدالله بن عمرو بن العاص راح بات معاه
ثلاث ايام علشان يعرف هو أنت بتعمل إيه ف
ملقاش عنده لا كثير صلاة ولا كثير صيام
ملقاش عنده لا كثير صلاة ولا كثير قيام ولا
كثير صيام يدوبك بيصلي ركعتين خفاف كده
ويصلي الفرائض وخلص.

فقال له أنا مش عارف يعني في الآخر يعني
نفسي أعرف أنت بتعمل إيه عشان توصل
للدرجة دي؟

فقال له الجملة المشهورة قال " أما أنا فأبيت
وليس في صدري شيء من ناحية المسلمين
"

🔁 الكلمة إلهي قالها دي هي فرع عن
الرضا؛ تاني الكلمة إلهي قالها الراجل ده.. دي
فرع عن الرضا لأنه لا يمكن لا يمكن أن يبيت
الإنسان وليس في صدره شيء من ناحية
المسلمين إلا لو كان صاحب مقام رضا عالي.

عشان كده ربنا قبل من الشخص ده على قلة
عمله وخلاه في منزلة كبيرة أوي رغم إن
عمله قليل لأن عمله ده.. هي مش الفكرة بس

سلامة صدره ودي طبعًا الأشهر ناس لما
بتيجي تشرح اللايف ده بيقول سلامة صدره
كلام جميل، لكن سلامة صدره دي ناتجة عن
رضاه عن ربه ليه؟ لأن أنا أمتي أجد في
صدري شئ من ناحية المسلمين هو إيه إلهي
هجده في صدري؟

■ أجد غل.. أجد حقد.. أجد حسد صح؟

■ طب بيجيلي منين الغل والحقد والحسد؟

إن أنا شايف عندهم حاجة مش عندي وإلهي
عندي قليل وإلهي عندهم كثير وعمايز أبقى
زيهم طب دي ناتجة عن إيه؟

ناتجة عن أنت لا لست براضٍ عما أعطاك الله
سبحانه وتعالى، فلما أنت كنت مش راضي
عن إلهي ربنا أداه لك ترتب عليه إنك بتبص

للي ربنا أداه لغيرك وترتب عليه حقد وحسد
وغل وضغينة وترتب عليه أنك أنت بتبيت
وفي صدرك شيء من ناحية المسلمين فلما
أقول إن واحد بات وليس في صدره شيء من
ناحية المسلمين ده دليل على أنه له مقام عالي
في الرضا عن الله.

يبقى في الحقيقة لو أردنا إن أحنا نحلل
شخصية هذا الفز إلي دخل على النبي عليه
الصلاة والسلام في التلات أيام دول هو في
الحقيقة مش مسألة سلامة صدر على قد ما هو
ايه؟ رضا

🔁 وده يرجعنا لكلمة ابن القيم العظيمة تاني
فمن رضي عن الله بالقليل من الرزق رضي
الله عنه بالقليل من العمل.. شفتوا بقى فهتموها
؟

ابن عمرو نفسه مش قادر يستوعب ليه ده
عمله قليل إزاي ده المميز فينا رغم إن عمله
قليل !!

ابن القيم بيفسير لك ليه الراجل ده رغم إن
عمله قليل إلا إن ربنا علا شأنه أوى لأنه
رضي عن الله بالقليل من الرزق فرضي الله
منه بالقليل من العمل، جميل أوي يارب اجعلنا
من الراضين يارب.

الرضا ده يا جماعة منزلة عظيمة أوى
**{رضي الله عنهم ورضوا عنه ذلك لمن خشي
ربه}**

بيقول بعد كده الرضا يُنزل على الإنسان
السكينة التي لا أنفع له منها ومتى نزلت عليه
السكينة؟ يحصل له إيه بقى؟

استقام وصلحت أحواله وصلح بآله والسخط
يبعده منها بحسب القلة والكثرة، وإذا ترحلت
عنه السكينة ترحل عنه السرور والأمن
والدعة والراحة وطيب العيش فمن أعظم نعم
الله تعالى على العبد تنزل السكينة عليه ولا
تنزل السكينة إلا مع الرضا عن الله في جميع
الأحوال.. إلا الرضا عن الله في جميع
الأحوال

{ لَقَدْ رَضِيَ اللَّهُ عَنِ الْمُؤْمِنِينَ إِذْ يُبَايِعُونَكَ
تَحْتَ الشَّجَرَةِ فَعَلِمَ مَا فِي قُلُوبِهِمْ فَأَنْزَلَ
السَّكِينَةَ عَلَيْهِمْ وَأَثَابَهُمْ فَتْحًا قَرِيبًا }

علم ما في قلوبهم من الرضا عن الله فأنزل
السكينة عليهم وأثابهم فتحا قريبًا.

فأنا لما برضى عن ربنا ينزل على نفسي
حاجة خطيرة جدًا الناس بتُعاني من حاجة نقدر
نقولها ببساطة هي فقدان السكينة، أنت الآن
تمشي في الشوارع تتكلم مع الناس تخالط
الناس تشعر أن هناك أزمة في السكينة النفسية
الناس فعلاً كما قال الله سبحانه وتعالى ﴿إِنَّ
الْإِنْسَانَ خُلِقَ هَلُوعًا إِذَا مَسَّهُ الشَّرُّ جَزُوعًا وَإِذَا
مَسَّهُ الْخَيْرُ مَنُوعًا إِلَّا الْمُصَلِّينَ الَّذِينَ هُمْ عَلَى
صَلَاتِهِمْ دَائِمُونَ﴾

الناس الآن في هلع كل ما تيجي خبر
سيء هلع مرض ولو بسيط هلع اضطراب
بس في الأوراق المالية في الإقتصاد هلع..
زيادة أسعار أو قلة هلع..

﴿ في إيه؟ أين السكينة؟ أين هذا العبد

الساكن الهادئ؟ المتصالح مع نفسه مع ربه
سبحانه وتعالى إلهي يتعامل مع الأحوال حوله
أن هذه أقدار ونتعامل بسكينة يا أخواني يعني
وكل شيء بقدر والموضوع مش محتاج كل
الهلع ده.

هذه السكينة في ناس عايشين بها في ناس
بتشوف في عينيها السكينة دي هو في الآخر
مش مش نايم ولا مريح لا هو شغال عادي
بس في فرق قلبه عينه وشه باين فيه سكينة
ناس بتتحرك هو بيتحرك معهم بس هو ساكن
هادئ مستقر كما قال سبحانه وتعالى ﴿وَالَّذِينَ
آمَنُوا وَعَمِلُوا الصَّالِحَاتِ وَآمَنُوا بِمَا نُزِّلَ عَلَى
مُحَمَّدٍ وَهُوَ الْحَقُّ مِنْ رَبِّهِمْ كَفَّرَ عَنْهُمْ سَيِّئَاتِهِمْ
وَأَصْلَحَ بِهِمْ﴾

وأصلح بالهم دي دي ما بتتشراش دي
مبتعرفش توصل لها دي لو أنفقت ما في
الأرض جميعًا عشان ربنا يصلح بالك كده
وينزل عليك برد السكينة هذه أشياء لا
تُشترى.. لا تُشترى بمال.

وإنما لا ينالها إلا عباد الأفذاذ من عباد الله
الذين آمنوا وعملوا الصالحات وعلى رأس
الصالحات الرضا فمن رضي عن الله أنزل الله
عليه برد السكينة يبقى الدنيا وتتهبد حواليك
وأنت عندك نفحة هادئة امنة مطمئنة ساكنة في
قدر الله سبحانه وتعالى.

 دول بعد كده إالي أنا قولتلكم بقى بصوا
بقى الفائدة دي الرضا يفتح له باب سلامة
القلب فيجعل قلبه سليمًا نقيًا من الغل والحقد
والحسد فإذا كان قلبه سليمًا نجى يوم القيامة

فإنه لن ينجو غداً عند الله إلا من أتى الله بقلب سليم، وتستحيل سلامة القلب مع عدم الرضا..
تستحيل سلامة القلب مع عدم الرضا.

كلما كان العبد أشد رضا كان قلبه أسلم من الخبث والغش والضغن وسلامة القلب قرين الرضا وكذلك الحسد قرين عدم الرضا ده إلی ایه؟ إلی قولته لكم من شوية.

❏ خاينا نأخذ الفائدة إلی جاية دي أو السبب ده، من أحد الأسباب التي تعين العبد على الرضا أحنا كل ده في أسباب تُعين العبد على الرضا؛ بيقول إن الأسباب إلی تُعين العبد على الرضا ایه كمان بيقول إن السخط يوجب تلون العبد خُذ بالك عشان دي مهمة وعدم ثباته مع الله عز وجل فإنه لا يرضى.. فإنه لا يرضى إلا بما يُلائم طبعه ونفسه والمقادير

يعني الأقدار تجري أحياناً بما يُلائم طبعه وبما لا يُلائم طبعه، يعني أحياناً بتيجي حاجات حلوة بتحبها وأحياناً حاجات يعني فكلما جرى كلما جرى منها ما لا يلائمه سخط فلا تثبت له قدم على العبودية.

فإذا رضي عن ربه في جميع الأحوال استقرت قدمه في مقام العبودية وزال عنه التلون، شفتم الكلام الجامد ده كلام رائع رائع

بيقول إن العبد لو لم يرضى عن الله تلون في العبودية يعني إيه تلون في العبودية؟

يعني إذا كان القدر الذي وقع عليه يلائم طبعه وهواه وما يريد كان مية مية وعبد تمام ورضا وحب وشكر وصلاة وصوم وعبادة وكل حاجة.

فإذا جاءه قدر لا يُلائم طبعه ولا يوافق هواه
تلون.. تسخط

فبيقول مثل هذا العبد لا تثبت له قدم في
العبودية لا تثبت له قدم في العبودية وده
يرجعنا إلى العبودية لا تثبت إلا لمن رضي
عن الله في جميع الأحوال، لأن بعض الناس
عنده هوى في العبودية، وده بيدخلنا في مسألة
خطيرة هو إن العبد إذا فعل العبودية لهوى في
نفسه وليس لأنها عبودية قد لا يكون له أجر!
بعض الناس بتلاقيه مثلاً ممكن يكون بيشرّب
خمر، ممكن يكون بيزني ممكن يكون بيعمل
حاجات معينة، بس هو بيحب مثلاً يصوم يوم
مثلاً، بيحب إن هو يصلي مثلاً صلاة معينة،
هو بيعمل الحاجة دي عشان هو بس بيحبها!
مش الدافع الأساسي عنده العبودية! هو بيختار

من الشريعة ما يُلائم طبعه وهواه، ويرضى به يحس أن أنا كده كويس، أي شيء في الشريعة لا يوافق طبعه ولا هواه ما بيعملوش! فمثل هذا عبد سوء.. هذا عبد هواه وإن كان في الظاهر يتعبد بعبوديات، لكن عند النظر الدقيق هو لم يختار من العبوديات إلا ما وافق طبعه وهواه.. فإذا وجدت نفسك تختار من دين الله فقط ما يوافق طبعك وهواك وإذا حصلت مخالفة للطبع والهوى ابتعدت وأعرضت، فأعلم أنك عبد سوء، والعبد الذي يستحق لقب نعم العبد هو الذي يتعبد لله فيما لا يوافق هواه قبل الذي يوافق هواه، لذلك أيوب عليه السلام، وكذلك سليمان عليه السلام لم يأخذوا لقب نعم العبد إلا حين حصل لهم ما لا يوافق هواهم.. أيوب مر بمرحلة غنى وأهل ومال وكل حاجة

، ثم مر بمرحلة مرض طويل، لما تعبد لله بما
يرضيه فيما لا يوافق هواه أخذ لقب نعم العبد.
قال الله تعالى: ﴿ إِنَّا وَجَدْنَاهُ صَابِرًا نِعَمَ الْعَبْدِ
إِنَّهُ أَوَّابٌ ﴾ اللي عايز أقوله أن العبد الحق مش
اللي ايه..؟ بصلي أصل أنا بأحب الصلاة
ماشى ، طب صلاة الفجر.. مش انت بتحب
الصلاة؟ اه بس لأ ما بصليش الفجر أصل أنا
ببقى نايم , ما بعرفش يعني... لا صلاة الفجر
لأ ما بصليهاش... أصل ما بحبش أصلي
الفجر ببقى نايم .. طيب أنا بحب أشارك في
الجمعيات الخيرية و ابقى مع البنات ونعبي
رز ونوزع هـدوم! ماشى كويس، طيب يا
أختي لبسك مُخالف للشرع أنتِ مش محجبة
أصلاً أو لابسة بنطلون ضيق أو أو.. تقول لك
لا بص ما تكلمنيش في الموضوع دوت، ما

بحبش.. لا مش هعمله، يعني ليه نفرق بين هذا
وذاك؟ تمام؟ طيب.. أنت دلوقتي يقول لك أنا
بص أحب أوي أصوم يوم عاشوراء، أحب
أصوم يوم عرفة، كويس! طيب فين الأيام إللي
عليكي من رمضان إللي فات؟! مش عارف،
ما تجيبهاش ليه لغاية دلوقتي؟! ورمضان وهي
لسه ما جابتش الأيام اللي عليها وهيحصل كل
سنة وتترنق وترجع .. طب أنت يا أخي في
الله أنت يقول لك أنا أحب أوي أوزع بقى إيه؟
أوزع التمر على الناس في الشارع في
رمضان، بحب أوي الموضوع ده ، طب
تيجي تفطر على سجارة؟ طب السجارة دي
حرام. طب المسلسل إللي هتشوفه بعد الفطار
ده حرام. طب الإعلانات دي حرام.. يا عم
الشيخ بقولك إيه...؟ طب ما أنت لسه موزع

تمر ليه دي.. وليه دي.. هتחס إن هو ماشي
في سلسلة من العبوديات المعينة هي في الحياة
كلها على مزاجه توافق طبعه وهواه، وهذا لا
يثبت لك العبودية، ولا تثبت لك العبودية حتى
نراك تفعل ما لا يوافق هواك. خدّها قاعدة
دي، والله العظيم القاعدة دي هتخليك قتيل في
كل حاجة لا توافق هواك وبتدور عليها. ليه؟

علشان تثبت لنفسك وتثبت لله إنك عبد جيد،
ولست عبد سوء لا يتعبد لله إلا إذا إتفق
العبودية مع هواه، ولا يرضى عن فعل الله إلا
إذا كان فعل الله يوافق هواه، وأما إذا كان
الأمر والنهي لا يوافق هواه أو كان القدر لا
يلئم طبعه وجدته في نفسه شيء. لا ينفذ
الأمر، لا ينتهي عن النهي، لا يرضى عن قدر

الله سبحانه وتعالى. فاذا فهمت أنت هذه الفائدة
كنت حريص أن تثبت لله أنك نعم العبد.

وتبقى عايز فعلا تقول له من قلبك "يا رب
اللهم إني أنا عبدك".

بص بس الدعاء ده عشان إحنا بنقول له أحياناً
الواحد بيقوله بيحس إن هو كذاب، كذاب
يُخشى إن الدعاء دا يكتب عليه كذباً .. إنت
متخيل؟

(اللهم إني أنا عبدك) إنت مصدق نفسك؟ إثبت
لنا.. (اللهم إني أنا عبدك وإبن عبدك وإبن
أمتك، ناصيتي بيدك، ماضٍ في حكمك، عدلٌ
في قضاؤك) بغض النظر عن بقية الحديث.
لكن أنا لو الدعاء ده من قلبي؟! يبقى .. يبقى
لازم الاقي في نفسي واحد تاني. ما ينفعش
البنبي آدم اللي أنا فيه ده هو ده اللي بيقول بكل

قلبه كده بكل ثقة أنا عبدك ابن عبدك وابن
أمتك وأقول ناصيتي بيدك ماض فيها حكمك
عدل فيها قضاؤك.. لا ما تضحكش على
نفسك. !

بيقول بعد كده ابن القيم عليه سحائب الرحمة
بيقول : "الشيطان يظفر من الإنسان غالباً عند
السخط والشهوة. فهناك يصطاده .. لا سيما إذا
استحكم السخط. فإنه يجعله في هذه اللحظة
يقول ما لا يرضي الرب، ويفعل ما لا
يرضيه، وينوي ما لا يرضيه ولهذا قال
النبي صلى الله عليه وسلم عند موت إبراهيم
أن القلب ليحزن وأن العين لتدمع ولا نقول إلا
ما يرضي ربنا. إيه اللي بيحصل بقى؟
دلوقتي ناس بيحصل الآتي. أنا دلوقتي حصلي
قدر لا يوافق طبعي لا يلائم هواي أنا أكرهه

فحصل عندي عدم رضا، عدم الرضا ده إن هو بيقول لك الأسباب تعينك على الرضا. بيقول لك خلي بالك عدم الرضا ده هيدخل لك الشيطان، والشيطان بيدخل من مدخل عدم الرضا ده و بيشغل عليه بقى، فبيخليك بسبب عدم الرضا ده تقول كلام مش كويس، تعمل أعمال مش كويسة، تنوي حاجات مش كويسة.

مثلاً واحد راح شاف النتيجة فلقى نفسه ما جابش النتيجة اللي هو عايزها، ما دخلش الكلية اللي هو عايزها، مش راضي، بيغلي من جوة، حاسس بخرج كده من من القدر دوت.

بيعمل إيه صاحبنا؟ يروح ساخط .. شاتم ، سائب لاعن بعد كده خد بالك كل اللي بيحصل دلوقتي هو فرع عن الحالة اللي

حصلت له في اللحظة ديت، أول ما الشيطان
شاف جواه كده عدم رضا عارف في واحد
شافها قال إيه قدر الله وشاء فعل لعل أنا
قصرت، قدر الله وما شاء فعل ، الحمد لله علي
كل حال، ده أول ما يقول كدا كل خطة
الشيطان باظت.

تعالى للتاني بقا الشيطان مستتي كل الناس
بيبص في قلوبهم أول ما لقي واحد سخط بس
ما عجبوش اللي حصل إخترق على طول.
خلاه شتم، خلاه سب، طلع سيجارة، يقول لك
بقول لك إيه أنا قران دلوقتي.

سيجارة في سيجارة في سيجارة.. وبعد كده
جاب أصحابه ويقولهم خرجوني النهاردة أنا
عايز أنسى عايز أنسى القرف اللي شفته
النهاردة.

يخرج مع أصحابه ممكن يقع في قعدة
حشيش، ممكن يشرب خمر، ممكن يعمل
حاجة زنا أو حاجة ما كانش هيعملها أصلا في
حياته. بس هو بيقول لك أنا بقول لك أنا
النهارد خرماني والدنيا بايظة معي وأنا مش
فايق ومش شايف قدامي و معلش بقى ما
حدش يكلمني في حاجة. !

يروح رايح زاني، شارب خمر.. شارب
حشيش شارب مخدرات يروح يَفْجُر يروح
بتاع.

تحت زعم أنا أعمل إيه؟! ما أنا أنا الدنيا
عندي خرمانه خلاص. وإيه اللي جابه كل ده؟

اللحظة الأولى دي بس . إنه لو كان في أول
لحظة رضي عن الله.. لو في أول لحظة قال
الحمد لله على كل حال.

هو في أول لحظة قال: "قدر الله وما شاء فعل"
وإتهم نفسه.. لو قال: "لا إله إلا أنت سبحانك
إني كنت من الظالمين"

ما كنش الشيطان زفر منه بأي شيء .. لكن
بدأ يظفر منه بكل شيء بسبب كده.

واحدة كانت حصل لها خطوبة مثلاً وده
بيحصل كانت مخطوبة مثلاً ممكن أنتم هتلاقوا
الكلام ده بيحصل كتير.

كانت مخطوبة لأخ ملتزم، كانت مخطوبة
خلوا بالكم من المثال ده جداً ها؟ كانت
مخطوبة لأخ ملتزم، فلأسف حصل مشكلة مع
الأخ الملتزم دوت، يعني كانت خطوبة سيئة
جداً والموضوع إنتهى بشكل مش كويس فهي
في دماغها ربطت هي ساخطة على أدائه
وإسلوبه وطريقته.. بوظ لها نفسيته خالص.

وطالعة من علاقة مؤلمة جدًا، بس دماغها إن
العلاقة دي كانت إيه؟ كانت مع واحد ملتزم،
مفروض ملتحي ومفروض راجل بيعرف ربنا
وبتاع وهو ده اللي عمل فيها كده، فهي مش
راضية، والعلاقة إتفرشت بشكل مش كويس
هي مش راضية دلوقتي. مش قادرة تبقى
عندها حالة الرضا، ترتب على ذلك أول ما
الشيطان وصل لها لحالة عدم الرضا ديت وإن
هي الآن في عندها شيء من السخط ده خلها
على طول، أنا بكمكم في حالات بتحصل
وحصلت وأنا يعني الله المستعان يدخلها في
مدخل إيه؟

أولاً دخل لها في مدخل شُبّهات، فبدأت يحصل
لها ريب في بعض أمور الدين، بدأ يخليها
تراجع تاني أحكام الدين، وتتنظر لبعض أحكام

الدين بنظرة مختلفة، ليه ربنا أمر بكده؟ وليه ربنا ما أمرش بكده؟ وليه ربنا نهى عن كده؟ وليه ما نهاش عن كده؟ وبدأت تعيد تاني حساباتها في حكمها على حكم الله سبحانه وتعالى! هل ترضى به أم لا؟ ثم بدأ يجي لها رغبة في إن هي ترجع تاني لصحبة كانت سابقتها، وأنا مضيقة على نفسي ليه كده؟ أنا عايزة أفرش بقى عايزة أطلع بقا من العلاقة دي أنا قرفت أنا عايزة أفك عن نفسي.

﴿ **طب فك عن نفسك إزاي؟** هترجع تاني لصحبة كانت معها.. وتبدأ تاني ترجع لما كانت عليه، تسمع أغاني معاهم تخرج تطلع رحلات معهم، بزعم أنا بفك عن نفسي، أنا طالعة من علاقة كانت توكسيك، العلاقة كانت

مؤذية، علاقة كانت سامة، وأنا عايزة إيه
عايزة أريح دماغي خالص.

وبدأت ترجع تاني تختلط بأولاد علشان أفك
شوية من الخنقة اللي أنا كنت فيها مع الملتزم
دوت، وفي الآخر بدأت تنهار واحدة وراء
التانية وكل ده ليه؟ علشان لحظة الفسخ اللي
حصلت الأولى ديت هي لم تقابلها بالرضا، آه
هو قدر مؤلم وحصل اللي حصل تجربة
تتعلمي منها تروحي تعملي أي حاجة، لكن
أول ما الشيطان يشوف في قلبك عدم الرضا
ستفتحي له كل باب شر، وأنا أزعم أن منكم
بنات كتير شافوا بنات كتير وقعوا في مثل هذا
بسبب علاقة خطوبة مثلاً كان أخ ملتزم وأخت
ملتزمة إنتهت نهاية هي مش كويسة، فدخل

الشيطان من باب هو ذا الإلتزام هو ذا الدين
والدنيا إيه جابت بعضها وراحت.

فدي مشكلة كبيرة عشان كده النبي عليه
الصلاة والسلام قال إيه؟ قفل الباب على
الشيطان. قفله إزاي؟

قال: **"إن العين لتدمع"** تمام. **"إن القلب
ليحزن"** ها يلا يخش الشيطان؟ لا إنسى ليس
لك مدخل عندي، "ولا نقول إلا ما يرضي
ربنا." كده الشيطان إتكبس؛ لأن هو أول ما
يلاقى حزن القلب دمع العين يلا ها نخش
تروح إنت كابسه بإيه؟ ولا نقول إلا ما يرضي
ربنا. كلام عظيم.

ابن القيم بقى بيحكى موقف للفُضيل ابن
عياض، بيقول الفُضيل ابن عياض إنه مات
فرؤي في الجنازة مبتسمًا فالناس إستغربوا؛

إزاي بتبتسم في جنازة ابنك فقال إن الله قضى
علي قضاء فأحببت أن أرضى بقضاء الله،
فالناس يعني قعدوا يفكروا طب يعني أنه
أحسن؟ مين فعله أحسن؟ هل النبي عليه
الصلاة والسلام لما ابنه مات بكى ودمعت
عينه، وحزن ورضي، فضيل ابن عياض لما
مات ابنه ابتسم ورضي، فمن أكمل في
العبودية؟ قد يتوهم الإنسان للوهلة الأولى أن
الفضيل ابن عياض أكمل؛ لأن هو ابتسم
والصحيح بلا شك طبعًا أن النبي عليه الصلاة
والسلام هو الأكمل قطعًا في العبودية ليه؟ لأن
يا جماعة البكاء ده نفسه البكاء ده رحمة النبي
عليه الصلاة والسلام لما بكى قالوا له أنت
بتبكي؟ قال هذه رحمة؛ إنما يرحم الله من

عباده الرحماء خلاص؟ البكاء ده إسمه إيه؟
رحمة.

البكاء مش الصويت والكلام "الصويت حرام"
أنا بقول دمع العين، بكاء العين ده إيه؟ رحمة
حلو؟

الرحمة ابني ميت! وأنا ببكي، من أشق الأمور
في العبودية أن تجمع بين الرحمة اللي هي
دمع العين وحزن القلب وبين الرضا.

النبي عليه الصلاة والسلام نجح في الأشق أن
يجمع بين الإثنين يبقى العين تدمع والقلب
يحزن فحقق مقام الرحمة ثم نجح أيضاً في أن
يجمع معه مقام الرضا.

أما الفضيل بن عياض فوجد أنه لا يستطيع أن
يجمع بين المقامين، إما مقام الرحمة وعدم

الرضا، وإما مقام الرضا وعدم الرحمة.
فاختار الفضيل بن عياض مقام الرضا فأمسك
العين عن الدمع وإبتسم ورضي.

هو ما عرفش يعمل الإثنين مع بعض أنا مش
هقدر أعمل الإثنين مع بعض أنا لو فتحت
البكاء والحزن هلاقي في صدري شيء من
القدر، وأنا مش عايز كده عايز أرضى عن
ربنا تمامًا، فعلشان يكمل مقام الرضا جه على
مقام الرحمة، وأما النبي عليه الصلاة والسلام
فإستطاع أن يبلغ المنتهى في المقامين في
الرحمة والرضا بلا أي تعارض، فجمع بين
المقام الرحمة ومقام الرضا فكان مقام النبي
عليه الصلاة والسلام هو الأكمل قطعاً في
العبودية.

فهنا الحنة الجميلة دي؟ ربنا يبارك فيكم يا رب.

بيقول ابن القيم بعد كده أن مقام الرضا يقتل الهوى؛ لأن مقام الرضا دائماً بيضرب في الهوى.

الهوى عايز حاجة معينة، فيأتي القدر بما يخالف الهوى، فكل ما أنا أرضى برّبي نفسي، كل ما أرضى أرّبي نفسي كل مرضى أرّبي نفسي، لغاية ما هي ما تقدرش تستأسد عليا ثاني، ما تقدرش تستأسد علي ثاني كل مرة بغيرها.

■ هاديك مثال: - عندنا إثنين في الشارع مثلاً

إثنين في الشارع، واحد طويل وعريض وقوي والثاني صغير كده، فالصغير ده جه مرة إيه

يتجراً على القوي ده فراح ضربه علة حلو،
قالك بكرة هضربه جه ثاني يوم برودو حاول
يعتدي عليه راح ضربه علة جامدة، قالك
ثالث يوم هضربه جه ثالث يوم راح ضاربه
علة أجمد من الأول والثانية هيفكر يتجراً
عليه رابع يوم؟ خلاص هيتكسر كده ويخضع،
مقام الرضا بيعمل إيه في النفس؟ كل ما
ترضى عن قدر مؤلم كل ما بتأدب نفسك،
وبتقهر هواك مرة مع مرة تهدأ
خالص النفس، ومش هتستأسد عليك ثاني،
وتتحول أنت بقى تخش في كدر ثاني من
العبودية اسمه النفس المطمئنة اللي هي
مطمئنة إيه سكنت كده.

مش عارف إنت مبتتكلمش خلاص إخشع،
سكنت عارف أنت لما الراجل دلوقتي الفخم ده

يعدّي الواد ده الصغير يعمل إيه؟ يقعد كده ما
يعرفش يتكلم معه خالص، يقول له قوم قوم آه
إقعد إقعد إسكت إسكت خلاص. ليه؟ أدبه.

هي دي بقى النفس ال إيه؟ سكنت تمامًا،
خلاص مفيش الهوى ما يقدرش يغلبك الآن.
أنت سيطرت تمامًا على النفس، وده من
الفوايد الإيه؟ اللي بيقلها ابن القيم عليه
سحائب الرحمة.

مش عايز أطول عليكم بس هو الكلام عظيم
شوية.

طيب خدوا الفائدة الجميلة ديت هحاول أقول
فايدتين ثلاثة وأخلص إتفقنا؟ وأنتم بقى كملوا
بقى الفصل ده مع نفسكم. بيقول هنا ابن القيم
من الحاجات اللي تُعين العبد على الرضا القدر
المؤلم لا يخلو عن أمرين، يعني القدر المؤلم

ده حاجة من الإثنين: إما أن يكون عقوبة على
ذنب فأنظر إليه على أنه دواء لمرض.

أنت مريض وربنا أعطاك دواء إيه دواءك؟
ذنب خدت عليه عقوبة خلصت خلاص.
ولولا أن تدارك الحكيم إياه بالدواء لانتشر به
المرض. يعني لما ربنا يعاقبك فإنك بتفوق
فبتراجع عن الذنب وما كنش فيه غير كده. أو
يكون البلاء سبب لنعمة لن يصل إليها إلا بهذا
البلاء.

يعني ما فيش ذنب ولا حاجة إنت مش عامل
ذنب أنت كويس، بس ربنا ابتلاك بحاجة
مكروهة لنفسك، فالحاجة دي علشان توصلك
لنعمة كبيرة مش هتوصل إلا بالابتلاء
المكروهة لنفسك ده. أنا قبل كده يمكن ضربت
لكم مثال على كده إن واحدة مثلاً حصل لها

في الثانوية العامة كانت ممتازة ومجتهدة
وبتذاكر وكل حاجة، جت في أيام الامتحانات
تعبت عيت لأي سبب ما عرفتش تذاكر
كويس، راحت دخلت الامتحان ما جابتش
التقدير العالي، ما دخلتش مثلاً طب ما دخلتش
هندسة دخلت كلية أقل من كده، زعلت شوية
وبتاع، فإذا فجأة تخش الكلية دي تتعرف على
صحبة صالحة تتعرف على أخوات طيبات
تلتزم تلبس حجاب تلبس خمار تلبس نقاب
تختم قرآن تبقى داعية وكل دا كان بسبب إن
هي مرضت في أيام الثانوية العامة، ولو كانت
تمام ودخلت الطب أو الهندسة يمكن ما كانتش
تقابل هؤلاء الصالحات، ويمكن ما كانتش
وصلت للي وصلته ده.

فممكن يكون القدر المؤلم دوه أنت تتخيلوا
حاجة سيئة. دايمًا لما يقع عليك قدر مؤلم قول
ما هو حاجة من الإثنين: قول لنفسك كده
عشان ترضى.. من الآخر حاجة من الإثنين..

☞ يا ربنا بيعاقبني على ذنب، يبقى الحمد لله
دي حاجة كويسة خلصت أدي ذنب واتعاقبت
عليه وبفوق بالبلاء ده من الذنب ده وبتوب
وبرجع دي حاجة كويسة يبقى أنا كده لو ده
تفسيره يبقى كويس.

☞ أو تفسيره إن فيه حاجة أحسن ربنا
محضرها لي بس مش هوصل لها إلا بالبلاء
دوه. ففي كلا الأحوال على كل تفسيرات
البلاء بالنسبة للمؤمن مفروض يرضى. ما
هو يا إما أنا أستاهل عشان كده في الحديث
إيه؟ "عدلٌ فيّ قضاؤك." يا إما أنا أستاهل،

أنا عامل ذنب وأستاهل اللي بيحصل فيا ده
فخلاص زعلان لي ما دا كويس! أحسن ما
تتعاقب في الآخرة، وكم ان يعاقبك هنا أسهل،
وتفوق هنا أحسن. أو لا أنا ما عملتش حاجة
أستاهل بها عقوبة بس احنا نريد لك خير بس
مش هيجصل إلا كده. زي ما الولد إتقتل في
قصة موسى والخضر. مثال أهو الولد اتقتل
في قصة موسى والخضر بس ما كنش فيه
غير كده، كان لازم يتقتل، علشان يجي الولد
التاني يملأ حياتهم رحمة بدل الولد الطاغية
الكافر لو كان كبر صح؟ بص بقى لأقدارك
كلها بالنظرة دي كل حياتك تتغير.

بيقول بقى ابن القيم الحاجات اللي تساعدك
على الرضا أن تذكر أن أول معصية عُصي
بها الله تعالى كانت بسبب عدم الرضا، فإن

إبليس لم يرضى عن الله حين أمره أن يسجد
لآدم؛ لأن كان مخالف لهواه. عشان كده واحد
يقول لك إبليس إزاي كان أعبد العابدين وفي
نفس الوقت رفض يسجد لآدم؟! لأن العبادة
اللي كان بيتعبد بها كانت موافقة لهواه، وكانت
بتجيب له مزايا بيتعامل كويس، بيتعامل
معاملة مميزة عن الجن، واخذ وضعه وكمان
بقى في منزلة الملائكة. وده يرجعنا تاني إن
العبودية لا تثبت لك إلا فيما يخالف ولا يلائم
الطبع وما يخالف الهوى. فلما إبليس أمر بأول
أمر في حياته يخالف هواه فشل تمامًا، وظهر
بأنه عبد سوء، وأنه ليس بعبد أصلاً وإنما كان
عبد هواه في الحقيقة، إنه ما كانش يتعبد إلا
بالحاجات اللي بتعليه عند ربنا وبتخليه له
مقامات وتوافق كبره. أول ما أمر بأمر يخالف

كبره ظهر أنه ليس بعبد، وإنما عبد على
الهوى، عبد في ما وافق هواه، فلما أمر
بالسجود لآدم ظهرت المصيبة.

عشان كده كل ما تلاقي حاجة لا توافق هواك،
وتلاقي في نفسك شيء مش عايز تعملها تذكر
أن إبليس اتفضح في أول موقف لم يوافق
هواه. فاثبت لنفسك ولربك أنك عبد كويس،
صالح نعم العبد، واعمل اللي يخالف هواك،
وارضى باللي يخالف هواك.

هقول لكم آخر حاجة عشان ما أطولش عليكم
مع إن في كثير لسه..

بيقول هنا أن يعلم أن منع الله لعبده المؤمن
عطاء، وإبتلاؤه إياه عافية.

قال سفيان الثوري: **منعه عطاء**. وذلك أنه لم يمنع عن بخل، ولا عدم، وإنما نظر في خير عبده المؤمن فمنعه اختيارًا وحسن نظر.

زي ما ربنا قال إيه؟ ربنا قال: {وَلَوْ بَسَطَ اللَّهُ الرِّزْقَ لِعِبَادِهِ لَبَغَوْا فِي الْأَرْضِ وَلَكِنْ يُنَزِّلُ بِقَدَرٍ مَا يَشَاءُ} ^ج إِنَّهُ بِعِبَادِهِ خَبِيرٌ بَصِيرٌ { خلى ده فقير لأنه خبير بصير. خلى ده غني لأنه خبير بصير. دي عندها ولاد عشان خبير بصير. ودي ما عندهاش عشان خبير بصير. بص بقى الآية اللي في آخر سورة الشورى: {يَهَبُ لِمَنْ يَشَاءُ إِنَاثًا وَيَهَبُ لِمَنْ يَشَاءُ الذُّكُورَ} أو يعطي الإثنين قال تعالى {أَوْ يُزَوِّجُهُمْ ذُكْرَانًا وَإِنَاثًا} ^ط وَيَجْعَلُ مَنْ يَشَاءُ عَقِيمًا ^ع {

أهم حاجة عندي الآيات ختمت بإيه؟ قال
تعالى {إِنَّهُ عَلِيمٌ قَدِيرٌ} ليه الإسمين دول؟
{عَلِيمٌ} منع بعلم وأعطى بعلم.

{قَدِيرٌ} لم يمنع لعجز ولا لبخل. الله! إفهم!
الأسماء والصفات تغير حياتك،

إنه عليم قدير بيقول بقى ابن القيم (ولكن جهل
العبد وظلمه لنفسه جعله لا يعد العطاء والنعمة
والعافية إلا التز به في العاجل، وكان ملائماً
لطبعه، ولو رزق من المعرفة حظاً وافراً
لعرف أن المنع نعمة، والبلاء رحمة، ولتلذذ
بالبلاء أكثر من تلذذه بالعافية، ولتلذذ بالفقر
أكثر من تلذذه بالغنى، وكان حاله في القلة
أعظم شكرًا في الكثرة وهذه أحوال السلف)

مش طبعي يعني مش طبعي والله. آخر
حاجة عشان دي أجمل حاجة..

قال: أن رضا الله عن العبد لو رضي العبد عن
الله رضي عنه الله، ولو رضي الله عن العبد
فقد أُعطي أمرًا أكبر من الجنة، فقد أُعطي
أمرًا أكبر من الجنة وما فيها!

تعالوا نقرأ كده قال الله تعالى: {وَعَدَ اللَّهُ
الْمُؤْمِنِينَ وَالْمُؤْمِنَاتِ جَنَّاتٍ تَجْرِي مِنْ تَحْتِهَا
الْأَنْهَارُ خَالِدِينَ فِيهَا وَمَسَاكِنَ طَيِّبَةً فِي جَنَّاتِ
عَدْنٍ وَرِضْوَانٌ مِنَ اللَّهِ أَكْبَرُ ذَلِكَ هُوَ الْفَوْزُ
الْعَظِيمُ} وفي الحديث قال الله تعالى يتكلم أهل
الجنة يقول: (هل تريدون شيئًا أزيدكم؟ هل
تريدون؟ قالوا: يا رب ألم تبيض وجوهنا
ونحو ذلك؟ قال: فالיום أحل عليكم رضواني
فلا أسخط عليكم أبدًا.)

فَنَسْأَلُ اللَّهَ أَنْ يَرْضَى عَنَّا، وَأَنْ يُرْضِيَنَا، وَأَنْ
يَرْزُقَنَا الرِّضَا عَنْهُ حَتَّى يَرْضَى عَنَّا.

فَهُوَ حَتَّى أَحْنَا لَوْ رَضِينَا عَنْهُ مَا دِي نِعْمَةٌ
مِنْهُ، هُوَ الَّذِي خَلَانَا رَاضِيِينَ، فَكَلَّمَا رَضِيَ
الْعَبْدُ عَنِ اللَّهِ رَضِيَ عَنْهُ اللَّهُ. أَسْعَدَ النَّاسَ
بِرِضَى اللَّهِ فِي الْجَنَّةِ هُمُ أَسْعَدُ النَّاسِ بِالرِّضَا
عَنِ اللَّهِ الْآنَ الْآنَ.

فَدِي حَاجَاتُ بَتْسَاعِدْنَا عَلَى الرِّضَا يَا سَلَامَ
كَلَامَ عَلَى الرِّضَا تَحْسُ إِنَّ أَحْنَا فِي عَالَمٍ
غَرِيبٍ، فَيُنَاسِ الَّذِي بِيَعْمَلُوا كَدَهُ؟ فَيُنَ؟
فَيُنَ؟ لَوْ ابْنُ الْقِيَمِ كَانَ عَاشَ فِي زَمَانِنَا وَاللَّهُ
كَانَ تَعَبٌ قَوِيٌّ يَعْنِي.

بِسِ الْحَمْدِ لِلَّهِ سَابَ لَنَا الْكَلَامَ الْجَمِيلَ دِهِ فِي
كِتَابِهِ الْعَظِيمِ مَدَارِجِ السَّالِكِينَ.

ربنا يبارك فيكم يا رب ويرضى عنكم وأنا
أدعو لكم جميعًا بالرضا وإن ربنا يحبكم
ويرضى عنكم. أسأل الله سبحانه وتعالى
بأسمائه الحسنی وصفاته العلی أن يرضى
عني وعنكم وأن يرضى عن جميع المسلمين،
وأن يكتب لنا الخير حيثما كان، وأن يرضينا
به، وأن يقدر لنا الخير حيثما كان، وأن
يرضينا به، وأن يرزقنا البصيرة والمعرفة
حتى نرى البلاء عافية، وحتى نرى المحنة
منحة.

وأسأل الله أن يبارك في أولادكم، وأن يبارك
في أزواجكم، وأن يهديكم، ويهدي أولادكم
ويهدي أزواجكم، ويهدي زوجاتكم، وأسأله
سبحانه وتعالى أن يهدي الأولاد والبنات،
وأسأله في هذا الزمن المليء بالفتن أن يحفظ

ولادنا ويحفظ بناتنا، ويحفظ شباب المسلمين
ويا رب يا رب ربي لنا ولادنا وربى لنا بناتنا
عشان إحنا مش عارفين نلاحق على إيه ولا
إيه في زمن الفتن الرهيب اللي احنا فيه ده.
وأسأل الله أن يرضى عني وعنكم وعن جميع
المسلمين.

أنا أحبكم في الله، وأنا سعيد جدًا باللقاء ده
والله، اللقاء ده كان بالنسبة لي ممتع جدًا
والله العظيم أنا مستمتع.

اللقاء ده واللقاء اللي فات لإن موضوع
عجبني جدًا جدًا جدًا.

إن شاء الله هنفكر كده هقول لكم هنعمل إيه
المرحلة الجاية. جزاكم الله خيرًا. شكرًا على
حسن استماعكم.

سبحانك اللهم ربنا وبحمدك أشهد أن لا إله
إلا أنت أستغفرك وأتوب إليك السلام عليكم
ورحمة الله وبركاته.